

欽定剿平三省邪匪方略

正編

九

一



欽定剿平三藩方略正編卷二百六

庚申年

九月二十七日

丙午

台布奏言查額勒登保現在

統兵前往西鄉一帶督辦楚匪徐逆一股竄入

平利之烏龍池滋擾經副都統慶溥剿敗後竄

往安康之楊圈子慶溥仍趕回博坪扼住興安

郡城要隘於初五日馳至平溪河見有騎馬賊

匪已入博坪大路慶溥隨率副將李逢春等分

帶官兵兩路衝殺立斃賊匪六七十名官兵乘

勢緊躡復又斬獲二十餘名賊仍由南奔竄其

川匪龍逆一股前竄陝界經藩司溫承惠派兵

截擊後奔至斑鳩關對面大梁老林藏匿該藩

司復派鄉勇分爲三路抄截賊亦分作三隊迎

拒鄉勇鎗礮擊三路共斃賊一百六十餘名

生擒二十餘名該匪連夜由桃園子逃逸守備

王英等復督勇繞道邀擊又殲賊七八十名生擒四十餘名該匪遂由大小圍圈奔安康之四

季河南竄此近日南路情形也其西路由甘折回小股賊匪竄至唐藏隘口一帶冀圖闖入棧

道俱經防守官兵截回折竄至兩當靈官殿鄧家嶺經副將游棟雲從九品雒昂帶領兵勇乘霧衝殺殲賊七十餘名賊遂由妖魔洞翻山竄

入黑河分股竄至畧陽之張家壩亦經游棟雲
雒昂乘夜趕殺斃賊八十餘名生擒三十一名

餘匪無多該副將等現仍跟蹤搜斬此外伍逆

餘黨千餘人由甘竄近鳳縣之油房溝督臣長

麟帶兵來至方石舖已繞出賊前總兵汪啟亦

已帶兵迎剿棧內本有經畧原派之總兵德忠

臬司王文湧副將舒隆阿等分段防守布置極

爲嚴密尙可不致闌入惟時近冬令漢江漸形
淺涸沔縣南鄭城固洋縣江水深祇四五尺淺
不及三尺一交十月淺處更多經額勒登保派

令總兵關騰帶兵巡防江岸綿長究恐未能周

密

臣

復親乘小舟由南鄭城固沿江而下逐處

測量於最淺地面安設礮位酌派兵勇晝夜看
守使賊匪對岸不敢窺伺免致疎虞俟該二處

佈置妥協後再往洋縣一路察看安設奏入

上命軍機大臣傳諭台布曰台布前已令往西寧辦事伊接奉前旨自應將撫篆交付慶成卽日起程其堵禦截剿事務不復再降諭旨如此旨到時台布尚未前赴西寧卽着將該處情形及應辦事務告知慶成令其接辦可也

同日

上命軍機大臣傳諭各路軍營領兵大員陝甘四川
湖北各督撫曰剿辦教匪五載以來所發餉銀不
下數千萬兩此項餉銀原係供支軍營官兵鹽菜
口糧之需乃所發帑金總不敷用自由承辦官員
遇有餉項到省先將例不開銷之款任情支發轉
將官兵應領之項拖欠藉口餉銀缺乏甚至兵丁
有因拖欠鹽菜口糧竟致結隊潛回者現在承辦

各員雖未必敢如從前濫行支用但遇有解到餉
項或將本省他項應給之款先行給付以致支發
軍糈轉形支絀此則不知事體之輕重緩急試思
頻年在京在外撥給帑項原爲軍需而設則支用
亦應以軍需爲主如有牽混之處將來報銷時部
臣亦必議駁若地方偶有災賑自當專摺奏請如
本年夏間陝省地方秋禾被早有應行賑濟之處

一經台布奏請於軍需撥銀七十萬兩之外另發

去銀三十五萬兩辦理 賑務原屬兩無牽混斷不

准將此次所發軍需再於他項動支著傳諭各路

軍營領兵大員及各督撫等嗣後餉銀一項於撥

解到局時皆當一體遵照儘供軍需之用至兵丁

口糧雖例支大米前經降旨詢問額勒登保據奏

現皆米麵兼放卽小米亦堪支食是經畧一路並

不單支大米各路軍營自應做照辦理若必欲食
大米則是有意刁難所有各路領兵大員及各督
撫等皆應遵照通融籌畫妥爲經理軍營既可米
麵兼放自易採辦倘再有貽悞或小米麥麵亦竟
至缺乏則承辦糧員咎無可辭必當嚴叅辦理再
各路領兵剿賊管理糧務之員原應隨時供應不
得稍有遲悞乃帶兵之員往往藉口糧運不繼以

致剿賊不能得力而承辦糧員亦以軍行無定隨時轉運維艱並非糧儲不足似此互相推卸何日始能蕝功總之各路領兵大員及地方督撫等均係同辦一事現在各路賊勢已形殘敗不過數月即可辦竣當此功收一簣之時尤爲喫緊在地方官辦理軍需固應於軍營所到之處多方設法運送務期無誤而領兵之員亦當令該弁兵等隨時

酌量裹帶口糧卽使糧運稍遲亦不致枵腹從事
度於剿賊機宜更有裨益此係朕指示所及並非
他人條奏經此次通諭之後該領兵大員及各督
撫等務當協力同心和衷共濟於年內一律辦竣
同膺懋賞不可不倍加奮勉也

二十八日丁未長齡奏言竊臣連日帶兵兼程前

進途中接據保康等縣稟報並探信鄉勇回稱

賊匪直往房縣南山一帶狂奔並未燒燬民房

逃出被脅良民甚多賊匪所剩祇三四千人竟

欲仍由原來路徑走九道梁由竹山出境現在

明亮帶兵由房縣之珠莊洞等處前往截剿等

語臣帶領馬步兵丁正在加緊趲行本日接准

陝西布政使溫承惠來信內開曹家營戴家營

冉學勝張士龍唐明萬五股皆聚集西鄉境內

該縣緊與紫陽毗連賊匪以紫陽僅有額勒亨
額之兵希圖乘隙竄入溫承惠率領鄉勇趕至
紫陽會剿探得已有一股竄入紫陽之朱溪河
隨與額勒亨額帶兵趕赴毛壩關迎截又探得
川匪龍紹周一股已由太平邊界竄入紫陽之
繞溪河查繞溪河在紫陽之東我兵均在西路
竊恐賊匪東竄安康溫承惠卽帶兵由捷路抄

前趕赴雙河塘一帶迎截等語又接竹山縣稟
報探得龍紹周一股經溫承惠帶領兵勇連日

痛加殲剿並訊據逃出難民蔡勝貴等供稱龍

紹周賊夥約有七八千人聞說要竄往湖北如

不能東去卽想渡江北竄現經溫承惠派令守

備王英帶兵由五柞雲斑鳩關抄截溫承惠於

九月初一日親自帶兵自西而東由江之南岸

前赴廟溝攔截兼護江岸等語伏思前奉節次諭旨令臣帶兵赴陝會同慶溥截剿高馬戴徐等股賊匪途遇竄入楚省川匪卽行剿辦等因前因聞

知李紹祖陣亡之信臣當卽帶兵前進以期先

清楚境後辦陝匪今楚省川匪已由房縣南山狂奔其勢必由原路出境况有明亮倭什布兩路官兵前後夾擊料不致再有蔓延之事現在

陝省情形重於楚省臣白應帶兵趕赴該處或

會同溫承惠慶溥等和衷商議併力剿辦總不

使竄入楚境爲要臣現已至保康屬之前坪此

路卽可歸入房縣大道由二竹赴陝之紫陽計

程一千餘里倘賊匪由紫陽東竄楚境僅止四

百餘里深慮賊近兵遠臣帶領馬步官兵惟有

竭力速行趕緊出境早得迎頭痛殲賊衆以期

迅速蔽事惟是楚陝連疆路徑叢雜邊防尤重

於剿賊臣業已飛咨姜晟明亮倭什布趕緊設

法嚴防勿使竄越再查現在陝省賊數較多山

路險窄必須馬步兼用方期得力至明亮倭什

布兩處所帶吉林黑龍江馬隊已有八百五十

名似足敷用無需再為分撥所有臣現帶之吉

林黑龍江官兵一千五十名及兩粵官兵一千

名一併帶往奏入

上命軍機大臣傳諭長齡曰朕盼望平賊安民日夜
焦急本日長齡報到朕以爲必係已與明亮倭什
布會合將由川竄楚之藍黃白線四號賊匪痛加
殲戮及披閱所奏情形長齡以楚省川匪已由房
縣狂奔必從原路出境明亮倭什布兩路官兵足
資夾擊不致再有蔓延現在陝省情形重於楚省

長齡帶兵由保康取道二竹前往陝境會同慶溥
溫承惠併力剿辦是竟置楚省竄匪於不問矣長
齡所帶吉林黑龍江官兵俱係生力勁旅涉歷數
省行走數月甚不易易茲帶赴楚省自應及鋒而
試俾得展其所長乃長齡自抵楚以來總未遇賊
接仗前次奏到之摺據稱賊匪在南漳石碇坪一
帶焚掠長齡於十二日辰刻行至栗溪相離石碇

坪不過八十餘里並未兼程趕上今又棄楚省之

賊遠踰千里轉由保康二竹赴陝迎剿紫陽東竄

賊匪舍近圖遠是誠何心似此來往奔馳將有用

勁兵徒勞跋涉必致又形疲乏况軍行一日卽須

一日口糧而所調馬匹馳驟日久亦不能得力豈

朕遠調此項勁兵健馬籌撥無數餉銀當此秋高

氣爽之時不用以打仗殺賊僅供保護長齡於無

賊處遊山玩水乎且明亮前因楚重於陝置徐逆
於不辦折回楚境此時長齡又以陝重於楚並不
與明亮倭什布在楚會剿徑赴陝省顯係各懷私
意互相推諉全不以軍務爲重賊匪何時始能剿
盡耶長齡甫經帶兵不應卽沾染軍營積習若此
著傳旨嚴行申飭長齡現已由二竹前赴紫陽正
龍紹周等股賊匪由陝東竄來路伊旣稱速行趕

緊出境迎頭痛剿則係伊自任之事所有此股賊
匪卽責成長齡剿辦若能痛滅賊衆或剿淨一股
仍當加恩優獎倘不能上緊截擊致令闖入楚境
或抵陝後復稱賊匪已聞信先行逃竄又欲移兵
他處防堵則是有心避賊必將長齡按律治罪另
派他人前往帶領吉林黑龍江勁旅不可不倍加
儆凜也至長齡如在途次遇賊打仗得勝自當專

銜馳奏若已抵紫陽後應受經畧節制凡有剿賊情形著報明額勒登保轉奏以符體制

三十日已姜晟奏言竊臣自明亮帶兵回楚以

後當經疊次飛飭鄖陽府及竹谿竹山二縣厚

集義練各勇與各卡隘原設兵勇會同該處守

卡之叅遊等協力商籌擇要固守旋據該府縣

等稟請飭留孫清元帶兵千名率同練勇於二

竹適中之地作為遊兵截擊以資邊防等語正
在咨商明亮抽撥間茲欽奉

諭旨令臣派撥將弁兵丁前往二竹防禦查廣西總

兵德昌在穀城收集明亮軍營落後兵丁先經

收集兩粵兵一千名業經長齡帶往隨征又續

收粵兵七百五十餘名適德昌管帶過襄臣咨

明明亮即飭令德昌帶領前往二竹與該處文

武會籌擇要嚴防不使徐逆及陝省別股賊匪
折竄闖入已於二十三日自襄啟行至陝省竄

匪頃據隨營道員依精阿並保康縣稟報該匪
等因官兵緊躡十九日回竄房縣西南之松香
坪紫竹一路距九道梁僅數十里前途山徑散

漫卽屬川境後有追兵似可無虞折竄臣查徐

逆竄入陝境川匪又已逼回原路各處邊防實

屬當務爲急日內接據竹山縣轉據平利來信

稟稱青號徐逆賊探復由安康屬之小鎮折至

平利黑虎溝一帶距平利縣一百餘里等語是

二竹邊防尤爲喫緊伏思二竹邊界綿長數百

里原設緊要卡隘十五處共計兵勇一萬二千

餘名本年正月倭什布撤帶隨營外尙存五千

四百餘名加以現在派往粵兵七百餘名是否

足資防禦須臣親往查勘且專仗兵勇爲邊防

實非久計近聞各該處應設卡隘較往年漸有
加增蓋緣兵勇在彼駐守日久伐木築屋及採
取柴薪以致本無路徑之老林踐踏成蹊賊匪
易於穿越邊界綿遠勢不能多設兵勇常川堵
守是以臣前次奏及該處山徑老林凡罅隙可
通之處必當相度形勢設法以人工彌補堅實

其萬難補苴之隘口酌派本處標兵固守設或
有警益以本地團勇臨時堵禦庶可計一勞永

逸

臣

前次奏蒙

恩准發楚之候補道海昌張映漢及陞任丁憂知府

田瀨均經先後到襄現在飭派海昌先往竹谿

一帶會同履勘籌辦設防事宜

臣

亦卽於數日

內起身前赴鄖竹各處因地制宜孰籌妥辦務

期固防節費再臣欽奉

諭旨明亮節次所奏由川竄楚賊匪並不確實是否

係地方官探報不明抑係明亮自行捏造希圖卸

責令臣查明據實密奏臣查此次川匪竄入房縣

境內臣處初據房縣李維木來稟亦稱賊目冉

徐張王四逆均有萬餘人其蔣觀濤稟稱唐龍

二股及苟文明俱竄至房縣之處臣處未據此

稟近據竹谿縣探得龍紹周一股九月十五日

由安康屬之四季河羊溪河竄至平利苦竹關

花栗樹等處滋擾勢向東北慶溥移師堵剿苦

竹關距竹谿縣城三百餘里等語是龍紹周股

匪並未竄至房縣該文武等多憑差探無據之

詞據以具稟明亮雖無自行捏造情弊其率據

各屬稟報鋪叙入

告業蒙

聖鑒至明亮軍營落後兵丁爲數過多詳細體訪並
於總兵德昌到襄面加詢問據該鎮稟稱明亮
前由均穀房鄖一帶往來剿賊每日行走總在
百里內外時係六七月間兵丁多有觸暑臥路
不起者及賊折回房保一帶又由南漳均穀躡
蹤追擊愈加迅疾兵丁腿脚疼腫每日紮營查

點時或少數十名至一二百名不等無暇查催
直至由陝折回始行派員收集現除已經收集
一千七百餘名尙少四百餘名其中養病及病
斃逃亡之兵尙須細查又直隸河南協濟馬匹
並於北省滿漢各營酌調及襄局原存喂養共
馬二千五百九十二匹內應付吉林黑龍江官
兵隨營員役乘騎並撥付明亮倭什布軍營共

馬二千二百七十二匹又倒斃四匹尙存馬三百十六匹現飭襄局好爲喂養以備軍營調撥或應撥補各營調缺馬匹臨時酌量辦理各路軍營兵丁隨征日久必須添補衣履以資禦寒若由原營製解遠不及濟先經臣飭令襄陽局

製辦棉襖套褲等項五千分現已分路解交散給所有工料銀兩係軍需項下動支墊辦俟飭

取營分花名清冊到日照例分別咨行各原營
坐扣歸款奏入

上命軍機大臣傳諭姜晟曰藍黃白線等股竄匪由
房縣西南一路竄回川境明亮等未能迅速趕上
痛加殲戮仍任其逸出楚境此係明亮等之罪與
姜晟無涉但賊匪旣竄回川則楚境現已無賊明
亮係專派剿賊之員早經降旨諭知如賊匪折回

川省令其追剿入川明亮自己遵照諭旨赴川剿辦此時楚省防堵最關緊要姜晟與倭什布孫清元俱當在本境防堵倘賊匪經德楞泰等分飭鎮將迎頭截擊亦難保其不又竄回楚境再徐添德一股現在平利一帶奔竄經慶溥溫承惠等併力剿殺雖有長齡前往迎截亦難保其不折而向東是房竹巴東一帶均應嚴行守禦雖楚省邊界與

川陝毗連地方道路綿長然賊匪數年以來由川

陝竄入楚省已非一次必有往來熟徑該省地方

文武寧不知之卽如姜晟摺內所稱山徑老林罅

隙可通之處設法以人工彌補亦係因地制宜之

法姜晟務當與倭什布督率所屬厚集各該處兵

勇於扼要處所一律嚴防以期聲勢聯絡毋任川

陝賊匪一名闖入俟大功告竣必將姜晟倭什布

與帶兵大員一體加恩倘有踈虞則姜晟倭什布
及派出防堵之員均當從重治罪至總兵德昌收
集落後粵兵已經姜晟查明係因明亮行走緊急
以致落後此項兵丁旣形疲乏若令其前赴明亮
處剿賊已屬無及著卽交德昌帶領幫同在楚境
堵禦將來事竣卽可就近撤令回粵至兵丁內有
實係患病難愈者留於軍營亦屬無益着姜晟等

查明撤令先行回粵並此外如有傷病老弱無用之兵亦當查明令其各歸原伍以節糜費

同日吳熊光奏言竊臣前接探報湖北川匪竄

至南漳之巡檢司一帶長齡帶領吉林黑龍江官兵趕赴南漳會同明亮倭什布等剿辦現聞賊匪又竄往房縣歐家店是賊已有折回西竄之勢但青號一股竄至陝省洵陽平利境內二

竹一帶現無官兵截剿仍難保其不復折回而
紫陽等處聞尙有川匪窺伺目下旣交冬令江
水漸就消落楚境未經肅清南路防範總應加

嚴臣現在鄧州就近督率臬司完顏岱護南汝

光道林樹芳都司楊景芬等於江岸嚴密巡防
不敢稍存大意至西路賊匪情形現准鎮臣常
林田永桐等札稱探得陝省賊匪三股由沔縣

缸廠竄入南鄭屬之南山一帶一股向青戶關

有入蜀之勢一股已自行投出一股向南鄭交

界之二郎壩東竄西鄉境內楊遇春由二郎壩

拔營進剿經畧額勒登保現已移營南鄭屬之

茶房子駐劄督辦等語臣查二郎壩在漢江以

南現有額勒登保督同官兵剿辦自無虞其向

東北奔竄但漢江上游一交冬令水勢更淺臣

已疊札常林田永桐督率將弁隨時偵探陝境
賊蹤於盧浙各口隘加意嚴防不可稍涉疎懈
奏入

上命軍機大臣傳諭吳熊光曰現在由川竄楚藍黃
白線四號賊匪經官兵截剿有折回西竄之勢適
據姜晟奏報楚省竄匪因官兵緊躡已於十九日
回竄房縣西南之松香坪紫竹一路距九道梁僅

數十里前途卽屬川境後有追兵似可無虞折竄

等語此時楚境已無賊匪現又諭令姜晟等扼要

守禦但已屆冬令江水漸次消落豫省江岸仍須

防守該撫旣在鄧州駐劄務當督率完顏岱等於

沿江一帶嚴密巡防不可稍存大意至陝省竄匪

現在西鄉一帶遊奕額勒登保分飭將領截剿自

不敢向東奔竄惟昨據長麟奏伍金柱餘匪會芝

纂言三才直之皇朝卷三十一
三十一

秀一股從白家店山梁竄入南山老林藏匿已專
交長麟定位等入山抄截此股係在漢江之北南
山老林一帶與商雒相連距豫省邊界不遠吳熊
光當督飭鎮將等於盧浙各口隘仍前實力防堵
俟功竣之日一體加恩

欽定剿平三省邪匪方略止編卷二百七

庚申年

十月初一日

庚戌

明亮奏言查賊匪由歐家店向

栢木受陽奔竄後有倭什布帶兵緊躡其勢必

由房縣屬之上龕竄出北可竄房保西可走二

竹

臣

督催官兵星夜由保康房縣兼程前進二

十日馳抵獅子巖探得賊匪從園土坪白衣菴

竄近上龕

臣

躡得捷徑由羊义河至上龕計程

一百二十里路徑險窄官兵魚貫而入二十一

日三鼓至白玉坪據長探行營外委黃興隆報
稱各股賊匪俱已竄至上龕中龕一帶屯紮

臣

當令官兵稍歇五鼓發兵由土洞子沙包抄道
進剿及抵上龕遙望各股賊匪四散焚掠察看

該處山勢層疊林箐深密各山腿皆有窄路莫
辨賊匪大隊所在當派總兵孫清元等由左手

四溝進擊派富翰江鼎雙福等帶領馬隊從中
抄截復派副將樊雄楚等從左手山梁進發派
副將王懋賞等緊隨馬隊前進臣督率遊擊承

祿等從中策應訖各股賊匪分投抵禦情形極
爲兇悍孫清元督兵下壓賊匪始猶抵死抗拒
被官兵鎗箭齊發立斃賊匪百餘人賊卽分爲
三股逃奔孫清元追擊大隊富翰江鼎雙福分

路馳射殺死賊匪百餘名藍翎部委驍騎梭花
連布射斃戴白頂藍翎賊目一名賊匪退入深

林內吶喊搖旗散而復聚撲壓三次千總劉洪

昇把總吳全仰攻陣亡千總王大魁額外委

海世魁均受矛傷臣細窺兩旁密林內層層埋

伏飛飭樊雄楚王懋賞分爲兩翼遠用劈山礮

轟擊近施進步連環下山衝壓官兵之賊被富

翰江鼎雙福左衝右擊殺死多人賊始潰敗我

兵乘勢進擊復殺賊匪二百餘名擒獲蕭維宗

等二十七名奪獲鎗矛旗幟騾馬無數該匪翻

山狂竄而各山梁林箐內望哨賊匪或一二百

名或五六百名不等往來牽綴遂派首領陳九

思千總祁祥等帶領二竹暨陝西鄉勇搜剿殺

賊一百餘名生擒蔣起貴等十八名各路官兵

正在乘勝追趕間忽青峯溝突出賊匪千餘人

抄截官兵臣等併力追殺富翰江鼎等馳射深

入立斃賊匪數十人將賊衆逼入山峽內兩旁

林內又有伏賊肆出富翰江鼎雙福等腹背受

敵齊力衝出江鼎箭全射完馬受鎗傷遂身受

矛傷數處陣亡甲兵納依濟保上前救護身受

矛傷二處孫清元催兵截殺遊擊孫應率首先

衝入賊隊右胯受傷猶搶賊矛手心帶矛傷一

處外委江化春力敵陣亡千總向開武額外任

得福俱受石子傷不重

臣

督催官兵飛馳接應

殲斃數十賊餘衆均折回青峯溝竄走時已酉

正暫令紮住隨提訊獲犯夏應魁等僉供川匪

竄楚共有四股係黃白藍線四號白號元帥是

樊人傑還有大頭目張三掌櫃有一千餘人線

字號只有幾百人大頭目陳天才已死今歸入
樊人傑股內黃號元帥是王四猫子還有大掌

櫃王國賢有二千餘人藍號從前原是冉添元

管領因在四川被官兵打死現在係伊兄弟冉

添士卽冉添亨是冉文儔姪兒在藍號管事亦

有一千六七百人白藍二號有楊益袁二總兵

沈蕭葛二先鋒現在黃白藍線四號若遇官兵

就合攏打仗若不遇官兵卽分開各自覓食今

日因官兵在後追趕得緊元帥等商量留數百

人埋伏在老林內抵敵官兵帶大隊先來想奔

房縣官渡將官兵誘入山內還繞到均州穀城

南漳擄些牲口糧食再回四川不想又遇大兵

在前攔截殺傷許多人馬如今大衆逃散亦不

知去向等語當將夏應魁等三名卽行臠割盛

正相等二十四名本川中積賊概予駢誅其餘
朱世舉江陳氏等二十八名口均係楚省被擄
人民卽散給盤費路票逐一省釋臣查賊供後

面尙留埋伏數百匪衆抵當倭什布一路官兵
恐倭什布直前追擊墮其詭計因飛派都司毛
秉剛等帶領兵勇連夜搜剿前去如遇伏賊正
可與倭什布一路官兵夾擊肅清後路詎日間

敗散之賊在山頭林內見有官兵向後路搜剿

該匪膽敢於三更時結隊直撲營盤欲使官兵

兼顧掣應經放哨各兵瞭見稟報臣飛飭兵丁

迅速整備俟賊匪臨近鎗礮兼發賊人一夜偷

撲三次及至黎明察看賊屍甚多山溝林內跌

巖滾死者不計其數臣查各股賊匪雖屬鴟張

經此次痛加剿殺已挫其鋒頃接房縣稟報長

齡已帶領馬步官兵行抵南漳臣飛劄囑其迎

探賊蹤前進可期合攻集事倭什布一路官兵

相離不遠卽日到來臣等會商妥協或分或合

不與以暇兵威益壯剿辦自易得手此次打仗

兵勇間有傷亡容俟查明咨部辦理奏入

上命軍機大臣傳諭明亮曰此次黃白藍線四號賊
匪竄至上龕一帶屯紮經明亮率領弁兵分路進

擊賊匪分股翻山逃竄復併力追殺先後斃賊五百餘名甚爲認真出力所辦可嘉本年九月節交立冬京師卽得雪四五寸極爲優渥本月朔日時

享

太廟朕親詣行禮旋於坤寧宮祀

神天色晴明氣候暄暖此皆仰荷

天

祖恩眷適遞到明亮捷報尤深叩感著頒發祀

神饌一分交明亮與帶兵將領等一體分嘗俾得共邀

天

祖福佑迅速蕙功又賞給奶皮一匣令明亮分賞出力

將弁以示眷念至此次帶兵殺賊各員花連布射

斃戴白頂藍翎賊目一名甚爲奮勇著以應陞之

缺卽用其深入賊隊馳射截殺之孫清元富翰雙

福孫應奉及甲兵納依濟保等著明亮查明分別

保奏候朕加恩其陣亡之江鼎年來帶兵打仗最

爲出力今馳射賊匪因遇伏賊衝出箭已射完受

傷身死甚爲可惜著交部照副都統例賜卹千總

劉洪昇把總吳全外委江化春殺賊陣亡俱著咨

部賜卹黃白藍線四號賊匪經此次官兵痛剿勢

已潰敗昨據姜晟奏該匪等已由房縣西南一路

竄回川境前屢降諭旨如楚匪折竄川省明亮必當帶兵入川緊蹙擊剿今此四股賊匪既仍由原路竄回明亮自應遵照前旨赴川剿辦倘明亮以伊係湖北總兵將賊匪逼剿出境後卽置不顧則辦理大錯料明亮受

皇考多年教育深恩亦不忍出此必應奮力所有此四股賊匪卽交明亮專剿若能於川楚交界處所速

行剿淨卽屬明亮之功倘賊匪已入川境明亮必
當跟蹤奮擊將各股匪衆悉數殲除不得專以擒
獲賊首樊人傑等卽爲完事總須剿辦一股卽殲
淨一股俾餘匪不致散而復聚庶可尅期蕝功明
亮一俟此四股賊匪剿淨卽在川幫同德楞秦剿
辦川省各股竄匪務期年內一律辦竣迅奏膚功

初二日

辛亥

德楞秦勒保奏言

臣

等探得劉朝選

湯思蛟張金連杜應杰等竄過後河分作兩股

劉張二逆走渡口巖湯杜二逆走井溪壩分路

奔竄又據探報七十五所剿趙麻花一股因官

兵在鎮龍關一帶阻水該匪卽乘間東奔已過

關口坪闌入雲開境內張子聰李顯必等折竄

太平開縣連界之濛濛溪而大寧老林內尙有

零星餘孽在彼出沒游奕均須併力兜剿肅清

東路臣等於初四日自清花溪分兵臣德楞泰

取道白沙河至井溪壩追剿湯杜二逆臣勒保

取道舊縣壩至渡口巖追剿劉張二逆並知會

七十五即由太平邊界緊貼西北一面而來臣

德楞泰於初七日至井溪壩知湯思蛟等已由

榨井壩竄赴東開交界之栢木園當即連夜督

兵冒雨前進初八日二更至瓦房坪距栢木園

祇二十里賊因雨大未動當即探明道路派令

副將託雲泰蒲尙佐等為左路由後山觀音巖

埋伏派令賽冲阿温春色爾滾等為右路由西

面團寨子進發

臣

德楞泰督率阿穆勒塔馬瑜

等為中路由子母壘進發天甫黎明

臣

與賽冲

阿兩路官兵同到賊在山梁亦分兩股悉力抵

禦我兵不避鎗石奮勇競上賊見官兵勢猛盡

棄輜重牛馬由後山滾巖越澗而逃官兵乘勢
掩殺殲斃偽總兵胡之魁並賊衆一百三十餘
名生擒李芳陳趙氏等八十三名口滾巖跌斃
者五十六人餘匪四散奔潰復經託雲秦等一
路官兵分投掩捕殺斃四十餘名生擒賊目湯
思川係湯思蛟之弟並謝貴等三十三名餘匪
由向家溝翻山奔逸十二日追至長店房適七

欽定四庫全書

十五亦由温湯井一路前來正遇賊探十餘人

到彼立時追捕擒獲探馬頭亢正剛訊據供稱

湯思蛟等現剩二百餘人在燈草壩山溝潛匿

隨留七十五在彼堵截臣德楞泰於十三日卽

帶兵馳往該處詎賊已聞信由高橋一路逃奔

當派賽冲阿等帶領馬隊追躡越過五重大山

趕至紫水壩又斃賊五十餘名生擒蕭得信等

三十餘名尙有一百餘人向大梁深林竄逸至

臣勒保一路於初八日至渡口巖據逃出難民

吳世郎供稱該匪等連日亡命狂奔劉朝選與

張金連相商分作兩路行走約在蒲家壩會齊

探聽官兵若俱向雲陽一路追去該匪等仍欲

折回太平臣勒保當派總兵永寧叅將田朝貴

等帶兵覓路抄截臣卽督同薛大烈侍衛花品

塔什拉等緊懸追趕十一日申刻至蒲家壩賊
已知有追兵正在跣渡前河卽經我兵趕上殺
斃八十餘名生擒瞿金玉等男婦一百十三名

口淹斃數十人我兵亦卽連夜淌渡追躡被急
流衝失兵勇八名十三日追至楊子嶺正值永

寧等由馬家坡一路抄出遇賊迎擊臣勒保卽

督兵兩面夾攻匪衆四散奔逸官兵分投追殺

又斃賊二百餘人，生擒偽先鋒陳元旗首黃之

華等五十六名餘，匪向路陽三壩竄遁。維時

臣

勒保因聞

臣

德楞泰在紫水壩一帶相距甚近

當令永寧等追躡竄匪前進

臣

勒保卽至紫水

壩會合。適據探報，張子聰等尙在濛濛溪老林

口屯紮，而徐添德一股業從楚省竄至。平利有

折回四川之勢。趙麻花已從大寧老林勾合青

號夥匪王姓由香坪桂壩一路轉回查現剿湯
劉張杜等四股所剩不過二三百人卽商令七

十五取道明通井等處顧住太平西北一面以

防陝匪竄逸派令永寧託雲泰各帶兵勇二千

餘名分投兜截搜捕臣等卽督兵由江口一帶

迎剿趙麻花等股之賊十五日行抵蘆花嶺探

知匪衆現屯楊柳坪王擬分兵進剿詎十六七

兩日大雨不止各處溪水驟發不能卽過江口
當卽多紮竹筏趕搭浮橋於十八日連夜冒雨
而渡直至十九日午刻渡竣探報賊匪約有八
九百人正於是日由寒池壩向大水田一路竄
來臣德楞泰卽督同賽沖阿溫春馬瑜等帶領
馬步官兵由溝內迎擊臣勒保督同阿穆勒塔
色爾滾薛大烈由右手山梁下壓該匪等正在

清內行走不防迎頭遇見兩路官兵奮勇衝殺
斃賊一百餘名生擒甘賢書等七十五名口賊

卽奔上左手馬鞍山倚險拒敵施放鎗石連壓

我兵三次我兵鼓勇直上攻撲愈緊匪衆旋卽
潰奔追過馬鞍山頂我兵已得地勢奮勇下壓

殲獲賊二百餘名追至石虎嶺時已昏暮查該
處週圍二四里俱係箐林賊卽奔入林內藏匿

黑夜難以搜捕^臣等恐其乘夜兔脫卽將兵勇

四面拏卡圈圍飭令各將備毋任一名逸出是

夜賊於大埡口衝撲三次均經侍衛達勒精阿

慶昌副將蒲尙佐叅將達自祥等帶兵擊退迨

至天明^臣等卽督兵進林搜剿賊見四路有兵

竟捨命衝突放鎗擲石兵勇間有受傷我兵四

圍並進箭斃大頭目李思印林士純鎗斃偽總

兵何崇信有賞戴藍翎之四川步兵何有富見
有一人身穿紅馬褂率領七八人向東奔逸知
係頭目何有富卽帶兵勇二十餘人盡力追捕
至溝底追及連戳兩矛倒地割取首級呈驗所
有潛匿之賊均經各官兵斬獲淨盡亦有在樹
林縊死者並無一名漏網統計點驗賊屍二百
二十八軀生擒探馬頭王添爵大旗首張杭並

趙麻花之妻張氏等男婦大小二百五十一名

口當將割獻首級逐一飭令驗認僉稱所殺穿

紅馬褂之賊實係趙麻花卽趙易應而其妻張

氏一見卽痛哭不止據供趙麻花係達州人乃

徐添德之徒與汪瀛同夥自汪瀛在川西剿散

被擒趙麻花卽稱僞元帥出川西竄回總在川

東一帶奔竄嗣經七十五在東鄉地方剿敗該

逆卽率衆由太平遁入大寧老林近在湖北邊
界遇見青號賊目王珊帶有三四百人逃回與
該逆一同折竄因聞徐添德將回四川欲赴太
平老林接會連日大雨在寒池壩紮住三日趙
麻花率其夥匪八百餘人先走令王珊斷後不
期至大水田猝遇官兵盡被擒殺王珊在後未
來不知逃往何處等語

臣

等訊供後卽將賊目

王添爵張杭等凌遲處死趙麻花首級解交達

州梟示趙張氏例應緣坐亦解達州監禁彙辦

其從賊日久之符德元等二百五十四名均卽

正法被擄未久之男婦陳田硯李劉氏等一百

三名口酌給銀米發交雲陽縣分別遞解回籍

搶獲驟馬二百四十餘頭匹與衣物器械等件

均賞出力兵勇_臣等伏查趙麻花一股亦曾竄

擾川西罪大惡極今幸仰仗

天威全行撲滅人心靡不稱快至刻下湯思蛟等四

逆雖未殲獲所剩實祇二三百人現有永寧等

兩路官兵前往追截自不致日久稽誅惟王珊

等三四百人既從川楚邊界竄回又有欲赴太

平接取徐添德四川之說亟須及早剿滅以免

蔓延臣等現已分兵三路先將此股兜剿完竣

腹地肅清卽可就近併力相機探剿張子聰等
公並川陝邊界之賊以冀剋期掃蕩奏入

上命軍機大臣傳諭德楞泰勒保曰此次德楞泰勒
保分投剿辦劉朝選湯思蛟等股賊匪多有斬獲
所剩不過二三百人令總兵永寧副將託雲泰各
帶兵勇兜截搜剿德楞泰勒保復會合迎剿趙麻
花等將該逆戮斃並殲淨此股餘匪實爲奮勇可

嘉德楞泰勒保俱著先行交部議敘其賞戴藍翎
之四川步兵何有富見有穿紅賊目奔逸卽盡力
追上連戳兩矛倒地割取首級呈驗係首逆趙麻
花尤爲出力卽著以千總拔補其餘打仗出力各
員仍著德楞泰勒保奏明候朕再降恩旨但須秉
公查奏俾軍營賞罰嚴明用昭激勸現在湯劉張
杜等四股賊匪祇有二三百人德楞泰勒保卽當

嚴飭永寧等上緊搜捕淨盡勿令他竄至摺內所

稱王珊等三四人欲赴太平接會徐添德自應

及早剿除以免延蔓德楞泰勒保已分兵三路務

須將此股兇剿完竣肅清川省腹地並合力剿辦

張子聰等及川陝邊界高馬戴龍賊匪再前據姜

晟奏到楚省藍黃白線四號賊匪俱將折回川境

昨據明亮奏在房縣地方得有勝仗本日又據倭

什布奏將賊匪殲獲多名逼向西竄賊匪被剿緊
急自必仍由原路折回川東已令明亮跟蹤追剿
此時德楞泰勒保在雲陽一帶截擊王珊等一股
正係藍黃白線四股賊匪折川來路德楞泰勒保
正可與明亮兩面夾擊一鼓殲擒轉不必將賊匪
截回楚境惟當督率將此四股竄匪在川境剋期
辦盡再徐添德一股已竄赴安康平利一帶瀘慶

溥溫承惠截剿恐其竄赴大寧今摺內又稱王珙
等欲赴太平接取徐添德可見該首逆亦有入川
之勢德楞秦勒保並當派委得力鎮將酌帶兵勇
前往迎截各路賊匪俱漸次逼入川境雖川陝楚
地方均關緊要但賊匪竄至陝楚必致散漫不如
聚集川境殲除較易德楞秦勒保不可不知此意
總之竄川之賊無論何股須有官兵剿辦不可任

其遊奕又致裹脅多人務於年內將各處賊匪悉
數殄平共膺懋賞

同日倭什布奏言竊臣督兵緊躡前進賊匪由

南漳保康西南邊界竄及房縣南山栢木坪白

衣菴一帶該匪狡詐異常每日大夥賊衆直前

狂竄後留三四百人於深林或窄狹山逕處所

埋伏抗拒臣查探路徑欲抄赴賊前兜截不特

道路迂遠且恐一經截剿該匪折竄深入房保
腹地官兵轉落其後不若儘力追擊每過林密
山險之處加意留心遇有伏賊搜剿前進以清
後路因選派奮勇步兵數百名在前繼以馬隊
勁旅探蹤進發十七日於保康之馬橋口二十
日於房縣之雙峯壩遇賊伏於山溝俱經官兵
先期探明從山頂覓道下壓鎗箭並發斃賊三

雙三才圖會卷三
四十名五六十名不等兩次搜擒活賊二十七

名並連日拏獲假扮隨營人夫及冒充難民之

任國選等十九名概與駢誅二十二日師次袁

杜坪探知該匪大隊竄往上龕官兵須取道荷

花朶一帶該處兩山聳立多係老林更恐賊匪

據險設伏嚴飭官兵小心戒備二十三日黎明

整隊而進辰刻行至荷花朶前隊官兵甫經轉

過山灣賊匪從兩山樹林衝出約有三四百人

幸官兵早經防備迎前施放連環擊斃賊匪數
名餘衆猶捨命撲壓馬隊勁旅繼以箭射斃賊
二三十名賊始敗走官兵追擊至七里塢適明
亮聞有伏賊派來策應之都司毛秉剛等帶兵
趕到迎住截殺前後夾剿賊匪惶急仍竄入兩
旁老林步隊兵丁亦卽趕入林內分投殲戮總

共斃賊一百六七十名餘賊穿出老林翻山向

西南疾竄官兵追剿二十餘里生擒傅益勝等

三十四名俱卽正法竄逸之賊約百餘名因四

散亂竄當派鄉勇分投搜捕臣詢問毛秉剛等

知明亮已率兵馳抵上龕將賊人前隊擊剿得

勝臣卽於是日酉刻趕至上龕與明亮會合現

在賊匪均從青峯溝一路西竄俟將進剿機宜

與明亮合商妥協另行具奏奏入

上命軍機大臣傳諭倭什布曰此次前竄賊隊經明亮迎頭截擊大加殲戮其留後伏賊又經倭什布與明亮派到兵勇併力夾攻多有斬獲所辦俱好現在倭什布已與明亮會合而四股賊匪亦均從青峯溝一路西竄自當乘賊匪聚集一處之時合力奮擊如果能在川楚交界地方悉數殲除不留

餘孽卽屬明亮倭什布之功朕必優加懋賞倘賊
匪被剿緊急竄入川境明亮自應遵照節降諭旨
帶兵緊躡本日已降旨令德楞泰勒保迎截與明

亮成夾擊之勢倭什布孫清元不必越境邀功仍

當酌留兵勇在本境督率嚴防並與姜晟於二竹

房縣巴東等處一體堵禦俟功竣後防堵之員與

帶兵之人當同邀恩賞況又留德昌及粵兵千餘

名足資分布惟在汝等調遣得當方能以堵爲剿
收功迅速若竄回川省之賊經明亮追往抄截仍
復折回楚境或陝省之賊由二竹一帶闌入則姜
晟倭什布孫清元派出防守之員均當從重治罪
凜之勉之

初四日

癸丑

長麟奏言

臣

前追剿伍金柱餘匪擒

殺多名該匪分爲兩股奔竄前股竄過棧道後

股已逼向南奔嗣據探報後股伍懷志賊匪自
楊家店順河逃遁後已於十六日晚奔至磨刀

石灣屯聚穆克登布等於十七日五鼓帶兵趕
往剿捕是夜雨雪交加泥淖沒脛穆克登布鼓

勵兵勇迅速前進奔馳三十餘里行抵磨刀石

灣天甫黎明賊匪正在起竄一見官兵卽紛紛
逃遁兵勇直前撲殺副將楊芳首先衝入賊隊

截斃賊匪十餘名賊匪被追緊急回身抗拒楊
芳正在奮力追殺猝不防左膝受矛傷一處
落馬復跌傷左臂兵勇一齊趕緊救起幸傷不
甚重兵勇仍前追殺該匪情急翻上元壇山大
梁滾石抗拒此時雨雪愈大山徑陡滑穆克登
布督率兵勇冒石上攻屢次力撲未能得手當
令遊擊桑漢帶兵勇數百由左手亂石溝穿繞

密林撲上山梁賊未及防登時奔潰官兵一齊

奮力壓下斃賊七八十名生擒三十四名均係

矛手概行正法餘匪卽由化坪老林向南天門

遁走時天色已黑難以窮追暫行紮住當經躡

探賊蹤又有竄出後川折向甘省兩當之勢臣

正在棧道一帶攔截賊匪東竄之路因接此信

卽連夜趕赴兩當縣屬之楊家店堵截以防賊

匪折竄甘境是夜賊匪果由南天門後川腦西

溝峽火地菴一帶奔向楊家店臣卽於五鼓督

兵迎往截殺詎該匪聞信復於黎明折向滾子

坪占壩一帶潛遁沿途搜獲賊匪十三人適穆

克登布等翻山趕來又搜獲賊匪十一名前後

獲賊均係矛手並據供稱伍懷志於十七日打

仗亦帶箭傷令人攙扶行走等語當卽概行正

法查該匪竄走占壩一路可由兩河口直通畧陽亦可由五郎坪奔赴沔縣是賊勢已經逼向南奔直趨沔畧現在阿哈保桑吉斯塔爾穆克

登布緊跟追剿已可無慮折回甘境

臣

卽擬帶

兵由城固洋縣趕入南山督同汪啟德忠協剿前股曾芝秀賊匪適接德忠來稟十五日午後探聞曾芝秀股匪由銅坡巖向夾山嶺溝奔竄

德忠卽帶兵趕往初更時直抵該處正遇賊匪

竄出溝口該匪遙見官兵卽紛紛奔上山梁官

兵奮力仰攻鎗礮齊發擊倒賊匪十數人生擒

三名餘匪潛入深林躲避官兵四處搜捕因天

陰月暗不見賊蹤候至天明探知賊匪已向獅

子嶺奔竄德忠卽帶兵由桑園壩平定關一帶

抄截將過桑園壩適遇大雨官兵衣履濕透仍

連夜冒雨前進十七日四鼓趕至大牛尾河賊
匪得信分爲六股奔上山梁官兵亦卽分投搶

上山梁盡力追殺鎗斃賊匪數十名該匪連夜

由獅子林太白河竄赴蓋屋縣屬之二郎壩一

帶向北奔逃德忠現已緊追前進汪啟一路由

藤牌溝折向梨園追剿沿途亦有搜擒各等語

查太白河可通斜峪關二郎壩可通辛峪口現

在北面沿山一帶並無防兵萬一該匪乘虛竄
出峪口擾及平原致令殘敗餘匪得資擄掠更
屬不成事體且賊蹤既向北趨距城洋一帶較

遠

臣

若仍由南面入山道路轉覺紆迴

臣

卽於

二十日自楊家店起程帶兵疾馳由斜峪關一

帶迅速兼程行走務期抄至賊前與汪啟德忠
等將會芝秀一股賊匪殄除淨盡斷不肯令其

日久牽綴俟將山內餘匪搜捕肅清臣卽移兵

趕赴紫陽西鄉一帶與額勒登保籌辦別股賊

匪再甘境業已肅清廣厚所帶之兵自當駐防

甘境臣已飛札該司帶兵駐紮楊家店並於唐

藏太渠等處安設卡寨以防甘省門戶奏入

上命軍機大臣傳諭長麟曰據奏穆克登布追剿伍
懷志一股長麟恐其折向甘省卽帶兵趕赴兩當

要截該匪竄走占壩一路南奔直趨沔畧現在既
有阿哈保桑吉斯塔爾穆克登布緊躡追剿且經
畧額勒登保駐紮西鄉亦可就近督剿是伍懷志
一股無慮其折回甘境惟曾芝秀一股係伍金柱
餘匪在甘肅境內奔竄時本交長麟在彼督剿乃
長麟未能剿盡以致該匪翻越白家店山梁由德
忠防守汛地逸出竄入南山老林旋經長麟派令

汪啟前往協剿今據奏曾芝秀復由獅子嶺太白
河窻赴蓋屋縣屬之二郎壩一帶長麟德忠汪啟
均有應得之咎而德忠之咎尤甚且據奏該處可
通斜峪關辛峪口北面沿山並無防兵萬一賊匪
乘虛竄出卽係平原此皆係長麟不能預爲布置
咎將誰諉伊現由斜峪關一帶迅速兼程抄赴賊
前迎擊若能與德忠汪啟奮力攔截卽在南山附

近地方將此股賊匪殲除淨盡則功過尙足相抵

或賊匪業經竄出峪口闌入平原地方長麟等尤

當上緊攔截斷不可令其北竄以致未經被賊之

區遭其蹂躪務當不遺餘力迅速剿盡若再有蔓

延必將長麟德忠汪啟與前罪一併懲治决不稍

貸長麟俟此股賊匪一經辦竣卽當移兵赴西鄉

紫陽一帶與額勒登保籌辦高二馬五等股賊匪

俾得於今冬一律蕝事至副將楊芳追剿伍懷志

一股首先衝入賊隊戮斃賊匪十餘名賊匪被追

緊急回身抗拒楊芳猝不及防致受矛傷落馬復

跌傷左臂現在受傷處所會否平復該副將打仗

甚爲奮勇如未得有花翎卽著賞戴若已有花翎

未得巴圖魯名號著卽奏請賞給倘該副將已有

花翎及巴圖魯名號亦著該督查明覆奏俟奏到

另降恩旨將楊芳交部議敘以示獎勵此時甘肅
雖無賊匪而邊界仍當一律嚴防長麟已札令廣
厚帶兵駐劄楊家店並於唐藏太渠等處安設卡
寨所辦尙是長麟自應隨時飭知廣厚嚴密守禦
不得稍有踈懈至甘省業已寧謐長麟原帶之兵
俱赴陝省辦賊所有甘省餘剩餉項著卽解交陸
有仁歸入陝省軍需備用

...

...

...

...

...

...

...

欽定剿平三省邪匪方略正編卷一百八

庚申年

十月初五日

甲寅

額勒登保奏言竊

臣

前因甘省

之賊未完不能卽撤棧道防兵又慮在川之賊

折回寧羌南鄭故在西鄉之明陽關一帶控扼

相機辦理昨於十九日據差弁探報有一股賊

匪自川省之簡池壩過巴山嶺一路竄入西鄉

罐子山距

臣

駐營之地二百餘里

臣

是夜四鼓

發兵轉由堰口二十日晚間趕過柳樹店連夜
偵探賊匪有由罐子山出私渡河之信當令官
兵飽餐卽帶同慶成札克塔爾等整隊啟行至
私渡河口天甫黎明該匪等在該處空房內分
散歇息不料官兵趕到經札克塔爾慶成分路
圍截該匪等拋擲器械慌忙逃奔我軍於上下
溝坎追殺疊斃賊匪二百餘人餘匪四竄尚有

三四百人攢聚翻山行走慶成等又帶領馬步
兵勇趕上於樹林中殺斃一百餘人該匪全行
逃散分兵四路追捕二十一二十二兩日共拏
獲賊匪五百二十五名口內訊出羅大爲蔣三
福段從五王夢才大小頭目四人僉供此股賊
匪係張子聰股內分出張子聰尙在川界因擄
食不足派令羅大爲楊允貴帶領小頭目男婦

共一千餘人向西鄉一路探聽官兵我等聽說
經畧統兵已往紫陽料得西鄉無兵所以前來
等語當將該犯凌遲處死此外二百八十二名
訊係從賊日久均卽正法其餘附近被脅之男
婦大小二百四十三名口概行給票釋放奪獲
大小旗四十四面鎗礮刀矛共一百八十餘件
據該犯所供約計尙有二三百人未獲然俱散

遁老林已無蹤跡

臣

另派兵勇搜拏並令寨上

團勇等一體跣緝以期淨盡旋接長麟來信知
伍逆餘匪分爲兩股前股曾芝秀帶領矛手四
百餘名及婦女老幼四百餘人已繞入南山之
二郎壩華陽等處奔竄其後股伍懷志所領餘
匪現在穆克登布等追剿已至華坪與兩當沔
縣接壤並稱此次曾芝秀股匪係由總兵德忠

所管白石舖汛地逸出棧東等因刻下德忠緊
跟追捕汪啟又經帶兵往剿並續接長麟知會

亦由大峪口帶兵前去當可無虞散漫但不及

早撲滅官兵多為牽綴臣隨派慶成於軍營抽

撥馬步兵勇二千由城洋捷徑抄入趕擊並以

該一帶老林過多官兵艱於搜捕又令候補通

判維昂帶原領之鄉勇前往協剿臣復嚴飭穆

克登布等將伍懷志一股趕緊剿殺並圍觀祥
等所剿零星賊匪亦在沔縣之北黑河一帶或
與伍懷志餘孽合夥又札知穆克登布等如卽
時併力剿淨固屬甚善否則逼入沔縣南鄭以

便

臣

派兵協力夾擊至

臣

近因賊匪分路四竄

所有官兵節經分派各路剿辦

臣

與札克塔爾

現帶官兵祇一千數百名暫劄城固之二郎壩

遙爲聲勢以扼川匪折竄南鄭漢南等處至楊
遇春與恒瑞前由西鄉進擊該處賊匪一聞兵
至卽遁入紫陽界內楊遇春等帶兵趕往現同
額勒亨額會合已從瓦房店金山梁緊躡而前
該處係馬五張世龍冉學勝張允壽各股竄匪
分合無定人數較多溫承惠現在平利一帶堵
截龍紹周殷匪東竄之路慶溥在磚坪一帶攔

剿並據深報徐添德股匪尙在川陝交界似有
與馬五等合夥之勢目下通計全局楚中自巴
東竄去之賊聞在房縣一帶此時明亮倭什布
長齡俱經在彼剿辦且新到之馬隊亦必得力
况該處三面濱臨大江似可無虞曾芝秀竄匪
若入五郎一帶臣已派慶成前去又有長麟汪
啟德忠帶領多兵四面兜擊當可卽了此時江

之北岸水勢漸落固宜緊防而各股匪或又折
回南鄭沔縣輾轉追逐更不成事應俟穆克登
布觀祥等將所剿之賊殲淨帶兵前來

臣

於南

鄭一帶酌量分兵固守卽深入紫陽安康督率
趕剿緊截東竄楚境之路俾免蔓延再查德忠
本係派在棧道堵賊之人乃伍逆餘匪曾芝秀
不及千人竟致由該鎮留防處所竄過卽或德

忠自知獲罪已重認真出力剿完此股賊匪亦
不能抵其疎防之咎應請

旨將巴里坤總兵德忠革職以昭炯戒俾各該將領
益知儆懼又西鄉紫陽等處賊夥前來侵擾恒

瑞綸布春帶兵剿擊未能全行殲滅臣恐本隊

兵力單微派

乾清門二等待衛巴圖魯吹扎布頭等待衛巴圖

魯定色鼐帶領黑龍江馬兵一百名隨後饋行
協力擊剿於本月初九日自木果園起程約四
五日內可到乃吹扎布等不遵臣指示之路由

石泉縣渡江自江北漢陰紫陽等縣復渡江而

南遲十餘日始到恒瑞綸布春軍營似此緊急

之時率意遲延貽誤軍機理應從重治罪但吹

扎布定色鼐俱出兵一二次曾經被傷著有勞

績請

旨將伊二人革去巴圖魯名號降爲藍翎侍衛仍留

軍營効力贖罪嗣後若果超衆出力再行據實

奏

聞鼓勵奏入

上命軍機大臣傳諭額勒登保曰據奏川匪張子聰
因聞官兵前赴紫陽令賊日羅大爲等分出一股

向西鄉竄擾額勒登保偵探得信卽帶同將領分
路圍截殺賊三百餘名拏獲賊匪五百餘名賊目
四名餘匪遁入老林另派兵勇搜捕所辦甚好其
竄入南山之伍逆餘匪曾芝秀一股雖爲數不及
千人但南山一帶半載以來早經寧靜今又被滋
擾若令竄出平原必至地方復遭蹂躪前據長麟
奏到朕正爲此日夜懸厪本欲令額勒登保遴派

大員前往協剿今額勒登保因該處雖有德忠汪

啟跟蹤追躡長麟亦帶兵前往究恐不能及早撲

滅致官兵多爲牽綴業派令慶成抽撥馬步兵勇

二千由城洋捷徑抄入趕擊額勒登保仍暫劄城

固之二郎壩遙爲聲勢以扼川匪折竄之路所辦

甚是惟當轉飭慶成督率官兵趕緊奮擊將南山

竄匪迅速殲盡並飭穆克登布等將竄往沔縣之

伍懷志等股趕緊剿辦其馬五張世龍冉學勝張

允壽龍紹周各竄匪亦令慶溥溫承惠實力堵截

額勒登保俟騰出兵力亦卽前赴紫陽安康督剿

至長齡現已帶領吉林黑龍江官兵迎赴紫陽平

利一帶會同慶溥溫承惠等協剿該處竄匪但吉

林黑龍江兵丁皆係生力勁旅正宜及鋒而用長

齡素未經歷行陣若將此項勁兵徒事往來奔涉

恐又嚙形疲乏著額勒登保派員迎赴前途將長齡作爲領隊大臣聽候額勒登保調派於剿捕更資得力至所奏巴里坤總兵德忠縱令曾芝秀竄過棧道請旨革職一節昨據長麟奏伍金柱餘匪翻越白家店山梁係由德忠防守汎地逸出是德忠疎防之罪爲尤重本欲卽將該鎮革職因伊現隨長麟在南山附近一帶領兵協剿賊匪是以未

卽降旨著傳諭額勒登保將德忠革職之處暫緩
宣示若此旨到時德忠能協同長麟等將會芝秀
一股卽行撲滅淨盡則德忠從前之罪止於革職
仍可留於軍營効力如尙有別項出力之處額勒
登保不妨據實奏明候朕酌奪倘仍前延玩不能
速行辦竣則其罪不僅止於革職額勒登保卽將
該鎮調至軍營傳旨革職審訊按例定擬具奏至

吹扎布等係巴圖魯侍衛遇有派委打仗理應迅速勇往今不遵調度繞道遲延甚屬可惡數年以來軍營大臣等從未參奏巴圖魯侍衛額勒登保係吉林人能不徇情面秉公參奏甚屬可嘉吹扎布著退出乾清門與定色彙均革去巴圖魯名號降爲藍翎侍衛留於軍營効力贖罪以觀後效

同日台布奏言竊照陝省用兵以來節年奉發

帑銀千數百萬領銀雖屬戎行易錢總由市肆
因之銀價日賤錢價日昂而漢南州縣中隔棧
道錢文更艱於流通民間所用市平轉比庫平
爲大每銀一兩僅核錢七百數十文及入百文
不等兵丁夫役口食等項在在需錢零星易換
市僧不免居奇於兵役大爲不便查嘉慶二年
興安商州等處曾因錢價昂貴於寶陝局撥錢

一萬六千串解往應用照搭餉之例每錢一串
作銀一兩於軍需項下提銀歸欵經前任藩司
倭什布奏蒙

恩允造冊報部在案現在漢中錢價亟須調劑

臣謹

於寶陝局提錢五千串委員解送漢中酌量搭
放以期市價漸就平減兵役均沾利益此後局
鑄錢文得有成數源源接運俟市價稍平再行

停止奏入報

聞

初八日丁巳長齡奏言臣日來深慮賊近兵遠惟

恐堵截稍遲加緊趨行官兵極爲奮往於二十

八日已抵竹谿節據差探回報青號一股已由

紫陽入道河竄近川界高家營龍紹周一股由

孟石嶺化龍山東竄距竹谿縣西南竹葉關西

面河卡隘相近又接明亮倭什布來信黃白二
號一股已由房縣之南山竄入竹山之洪坪似
有入川之勢又據探報自紫陽竄來一股賊匪
已至平利之魏家壩洞河一帶滋擾不知賊首
姓名勢向洵陽白河一帶北竄離白土關六七
十里各等情臣查賊匪雖分股逼近邊卡尙未
竄入楚境沿途悉心訪察楚省之二竹與陝省

之平利安康洵陽白河處處犬牙相錯竹谿之
西南則有石店河西面河竹葉關三處邊卡俱
係賊匪往來熟路竹山之西北則有銅錢關西
埡子吉陽關左季關等處亦屢經闖入若竄進
竹谿尙在邊隅猶可攔截若由洵陽白河竄入
竹山東趨則由鮑家店直至黃龍灘下達均州
襄陽南行則房保南漳興遠均在腹地此路實

關緊要現在明亮倭什布帶領滿漢各兵於房
縣之關東河一帶追剿自東北而向西南竹谿
邊卡可以兼顧臣現由竹谿之西北關垵入陝
省之洵陽董家梁一帶截剿以堵賊竄竹山之
路免致蔓延腹地並一面咨報額勒登保分兵
夾擊以期迅速歲事再欽奉

諭旨令

臣

查訪明亮有無避賊逗遛之事據實密奏

臣

前抵襄陽悉心採訪衆論僉稱明亮帶兵最久軍務原所熟練惟近來年力稍衰心思遲鈍

尙有希功之念未免迴護已短致有不得人心

之處是以剿辦事宜不能迅速歲事臣此次分

道進剿未能見面聞明亮近日頗知畏懼於追剿餘匪尙屬認真並無避賊逗遛之事一切剿

辦遲延誠如

聖諭實由不能振作之故荷蒙

皇上格外姑容嚴加教訓稍有天良必當盡力圖報

且經畧額勒登保近在平利臣亦相離不遠又

與倭什布合爲一處兵力不薄諒不敢再有疎

懈之處自取重戾奏入

上命軍機大臣傳諭長齡曰長齡於前月二十八日

奏稱西鄉屯聚各匪有一股竄入紫陽縣境又龍

卷三十一 聖祖皇帝三十一
四
紹周亦竄入紫陽之東陝省情形重於楚省帶兵
由保康取道二竹前往陝境會同慶溥溫承惠并
力剿辦已隔十日本日報到朕以爲長齡必係迎

禦紫陽竄匪及龍紹周一股督率勁兵奮力剿殺
具奏打仗得勝情形及加披閱尙在竹谿一帶取
道行走並未遇見一賊接仗一次而摺內尙稱官
兵加緊趲行極爲奮往若果長齡行走迅速豈有

日久總未遇賊打仗之理長齡所帶吉林黑龍江
官兵俱係勁旅且有粵省兵一千名足資剿賊之
用乃轉欲在洵陽董家梁一帶堵賊竄入竹山之
路竟係有心取巧擁兵自護若迅速赴紫陽一帶
將龍紹周等股痛加殲戮以剿爲堵則賊匪又何
能東趨入楚耶長齡在京時於朕前頗形踴躍奮
迅乃自抵楚以來不過節次奏報行走路程總未

趕上賊匪打仗似此觀望遲延虛糜兵餉轉瞬卽
屆沍寒又得以冰雪凝滑藉詞掩飾賊匪何時始
能辦竣不又爲那彥成之續乎至所稱明亮近來
年力就衰心思遲鈍尙有希功之念未免迴護已
短不得人心近日頗知畏懼等語所論尙是明亮
係久經帶兵出力之人今因年力就衰不能振作
經朕屢次嚴飭尙知畏懼長齡正當壯盛之年又

係甫經帶兵寧轉不知畏懼出力乎昨已諭令額勒登保派員迎赴前途將長齡所帶官兵卽行接管歸入經畧軍營長齡作爲領隊大臣聽候額勒登保調派長齡於未奉此旨之前在途次遇賊得有勝仗仍當自行具奏如祇係沿途行走毋得再行發報徒勞驛站若業經歸入額勒登保軍營自當受經畧節制卽派出打仗得勝均當報明經畧

具奏以符體制

初九日

戊午

德楞泰勒保奏言查青號分股賊目

王珊自大寧老林夥同趙麻花一股轉回欲向

太平迎徐添德來川在大水田地方被官兵將

前股趙麻花截殺淨盡王珊卽向雲陽折竄經

該縣梁敦懷率勇堵截又復竄往高陽

臣等因

太平一帶現有七十五一路官兵在彼可以截

其竄陝之路而溫湯井等處地勢險窄亦有路

可通老林當派副將褚大榮帶兵扼住要隘臣

德楞泰督同賽冲阿等過南溪河由元灘一路

追躡臣勒保督同溫春等由江口至牌堽口一

路兜截臣德楞泰於二十三日午後至開縣之

禮復山探知賊於是日早間已由該處起身當

卽連夜督兵追逐至二十四日申刻趕至大茅

坡正值賊匪在彼造飯一見官兵卽紛紛奔潰
我兵奮勇追殺至磨子巖時已昏黑斃賊一百

餘名生擒賊目鍾應昆等九十三名訊據供稱

王珊在濫泥溝身帶箭傷不能行走經官兵連

戮兩矛斃命當卽查驗屍軀割取首級認明屬

實餘匪尙有二百餘人出郭家坡折竄維時

臣

勒保聞信卽督同溫春等於二十五日抄至巫

山坎截擊詎賊匪探有官兵又向八廟橋奔逸

經新寧縣保全寨等處團勇截殺斃賊二十餘

人生擒三名團勇亦有傷亡二十六日巳刻我

兵追至觀音槽臣勒保卽同溫春等帶領馬隊

趕上直前衝殺賊衆大潰滾巖跌斃並殺死者

二百二三十名生擒旂首傅有萬等五十七名

內有王珊之師李思槐係徐添德徒弟衆稱爲

四老師父又經天元寨軍功團勇喻永福等搜
獲劉顯壽等八名查此股賊匪本祇有四百餘
人茲連次殺斃二百五六十人生擒一百六十
一名口首逆王珊業經殲斃其師李思槐亦已
被擒首夥剿淨川東實已肅清當將李思槐寸
磔梟示賊目鍾應昆傳有萬凌遲處死從賊日
久之陳友富等一百五名均卽正法惟被擄未

久之向思得羅李氏等五十四名口酌給銀米

遞籍省釋_臣等原思辦完此股之後川東川北

腹地已無賊匪惟張子聰劉朝選湯思蛟等各

逆在太平大寧老林內潛匿所剩賊匪無多先

派總兵永寧託雲泰等帶兵進山搜捕_臣等亦

當卽赴太平一帶督辦以期川省全數肅清再

剿陝西邊界之賊緣據署通江縣徐廷鈺稟報

有李炳陳朝官夥內賊目朱九齡帶有三四百人由陝竄至平溪壩經該縣督率壯勇迎擊殺

死並淹斃八九十人正欲過河追剿復有陝西

竄來張添倫張世龍齊國謨等餘黨千餘由金

溪河溝口突出當卽率勇衝殺斃賊一百五六

十人生擒僞總兵魏超賊目王三級李惠等十

三人投出龔序賢等一百五十餘人訊知該匪

等在南鄭黃官嶺被經畧額勒登保一路官兵
打散由羊圈關竄入川境隨後尙有李炳陳朝
官與楊開甲餘黨由灰灘等處竄來賊勢較多
該縣請派兵剿捕並稱此次打仗軍功首領郭
俸殺賊最多左目被賊矛傷壯勇亦間有傷亡
又據署巴州田文煦稟報陝省竄來賊匪四出
滋擾闖入該州所屬伍家河經元山寨團勇堵

禦殺賊二十三名現仍折回通江並據劉清探

報各股竄匪現因通巴境內寨砦堵禦嚴密無

處掠食欲由廣蒼一帶竄越嘉陵江各等情臣

等伏查自陝竄來各股匪衆被經畧一路官兵

節次痛剿均係敗殘餘孽剿賊大局臣曾與額

勒登保彼此札商如果將陝甘之賊全數逼入

四川官兵併力圍攻而川省各州縣寨砦自

年夏間經_臣等遵

旨籌辦堅壁清野鄉團各勇極爲奮勇出力剿堵自

易得手今川東腹地已清陝匪甫入川境正可

騰出兵力馳往川北截剿_臣等現卽取道營渠

至保寧一帶隨探隨進先行顧住嘉陵江西面

相機剿辦以冀速就殲除至七十五一路官兵

前令其在太平一帶堵剿昨據報稱於太平之

雙石子地方遇見劉朝選夥內打散餘匪數十

名卽行擊斃二十餘名生擒王士友等五名緣

聞通巴又有陝匪各夥竄入亦欲移師往剿第

思川北一路既有

臣

等前往剿辦而龍紹周一

股聞經溫承惠由紫陽截回且徐添德又有回

川之說東北面不便空虛

臣

等已知會該提督

卽由太平至通巴東北一帶偵探賊蹤帶兵截

剿夔巫一帶防堵事宜現派副將褚大榮前往
接管嘉陵江西岸嚴飭總兵許文謨副將趙得
功並專責防堵之道府各員督率文武兵勇實
力嚴防奏入

上命軍機大臣傳諭德楞泰勒保曰王珊一股匪衆
經德楞泰勒保督率將領分路兜截奮勇追殺斃
賊一百餘名生擒九十三名王珊身帶箭傷經官

集三卷之署新卷三
兵戡斃餘匪向入廟橋一帶奔逸復經勒保帶領
馬隊趕上衝殺斃賊一百二三十名先後生擒六
十八名內有李思槐係王珊之師當卽寸磔梟示
並將其餘賊目分別凌遲處死此次連獲大勝仰

荷

天恩益無涯涘叩感之餘實深敬畏王珊股匪本祇四
百餘名業經殲擒淨盡不留餘孽現在川東腹地

實已肅清所辦甚屬可嘉且據稱與額勒登保彼
此札商欲將陝省之賊全數逼入四川以便併力
圍攻等語覽奏更爲深慰數年來陝甘四川湖北
各股竄匪雖叠經官兵痛剿但賊情狡猾奔竄靡
常而各省帶兵大員又不免各存意見僅將該省
之賊驅逼出境卽爲了事不復顧及隣省其隣省
帶兵之員亦復如是賊匪輾轉奔竄日就蔓延最

爲軍營惡習現在陝省之賊如能逼歸川省剿辦較易此等情形朕所稔知今德楞泰勒保能見及此籌慮大局可謂無分畛域方不愧大臣任事之道德楞泰著賞給白玉帶頭綠玉喜字搬指大小荷包勒保著賞給綠玉喜字搬指大小荷包用示優獎又發去翎管搬指及搬指套各十個一兩重銀牌五百面五錢重銀牌五百面著德楞泰勒保

分賞在事出力將弁兵丁俾咸知感奮現在額勒

登保駐兵城固一帶陝省各股賊匪勢俱逼向西

南德楞泰勒保統領勝兵取道營渠前往保寧一

帶先顧住嘉陵江西面以期與額勒登保等兩面

圍攻所辦甚是嘉陵江一帶防守最關緊要現據

奏各股竄匪因通巴境內寨砦嚴密無處掠食欲

圖竄越若嘉陵江防堵不嚴又致偷渡擾及川西

完善地方更復成何事體德楞泰等務須加意防
範嚴飭許文謨等實力攔截不可稍有疎虞看來
川省近日團勇事宜尙屬認真辦理各州縣寨砦
頗爲得力可收堅壁清野之效德楞泰勒保若能
與額勒登保將陝省竄川之賊卽在川省悉數剿
除廓清全境以伸五年來朕之夙願仰慰

皇考在天之靈功大賞崇當同心加勉也至張子聰劉

朝選湯思蛟等股俱在太平大寧老林內藏匿已
派永寧託雲泰前往搜捕德楞泰勒保當轉飭七
十五就近督剿此等雖係剿敗餘匪爲數無多然
必須殲除淨盡當責成永寧等上緊搜剿勿令竄
往他處別有裹脅爲要署通江令徐廷鈺率勇堵
禦連次擊斃竄匪實爲奮勇可嘉著加恩賞給知
州銜以應陞之缺陞用其殺賊最多之軍功首領

郭倬亦屬出力伊如願出仕卽加恩以外委拔補
否卽賞給八品頂戴榮身以示鼓勵此時川東地
方已就肅清而楚省藍黃線等股俱有西竄之勢
經明亮等在房縣等處截剿緊急難保不又逸出
楚境竄入川東所有夔巫一帶防堵事宜業經德
楞泰等派令副將褚大榮前往接辦務須飭令該
副將在彼率領兵勇認真堵截如楚省竄匪闖入

卽當與明亮等兩面夾擊勿令再有竄逸至此時
川省軍營連獲勝仗而額勒登保等卽日將陝境
之賊上緊逼剿勢必併歸川北一路軍威更爲壯
盛勝兵所到之處賊匪等窮蹙畏懼自必紛紛乞
降德楞泰勒保當察看光景如果賊匪誠心投出
自應允准受降但賊情狡詐不可不加意嚴防恐
該匪等被大兵剿急計無所出相約詐降勾結轉

爲大營肘腋之患此最應隨時留心者德楞泰勒保尤當慎之又慎也

十一日庚申長齡奏言臣於途次接據陝西平利

縣任奎光稟報竄匪高二馬五現由大貴坪蔡家河炭河等處東奔已飛稟慶溥溫承惠分兵

追剿恐其竄入楚省等情臣細詢隨營知府周

季堂據稱該匪旣向東奔則由洵陽之銅錢關

大營盤七里關入竹山之北境心得抄往迎截

方免竄越之虞臣卽督率勁旅改由小道並催

趙兩粵官兵遄行於初二日未刻卽抵竹山之

界嶺探得該匪屯聚洵陽之王家坪一帶臣乘

其不備分派滿漢官兵爲三路令侍衛特依順

保並吉林黑龍江協領佐領驍騎校等官分帶

馬隊又派叅將雙福等分帶步兵臣督率各侍

衛章京等帶領官兵居中策應三路接續馬步

並進直撲賊之大隊該匪不知官兵突至情形

慌亂卽紛紛各據山梁分投抗拒

臣

細揣賊勢

惟有正西之大山賊勢較衆必有首逆在內卽

催令中路馬步官兵及鄉勇等繞道搶上山梁

賊匪拚命抵敵吉林索倫馬隊鎗箭本好馬又

得力奮勇衝撲立時殺斃二百餘人北面山梁

賊匪見我兵得勢卽分兩股抄襲後路臣派叅

將海麟遊擊拉里等率領步兵遠用大礮近放

聯環鎗箭並發殲斃七八十名適左右兩路馬

隊又已抄上山梁直往下壓賊匪情急四散奔

竄三路馬隊乘勢追殺二十餘里沿途坡溝斃

賊又有三百餘名生擒一百餘名該處山徑險

窄紛歧時已昏暮卽於該處紮營當將獲犯彭

大順等審訊據供我等三十五人俱在陝西四
川住家此股大掌櫃且生高二馬五前月在安康
之銀硃壩被楊提督官兵殺斃卽由小路竄入
不利魏家壩地方探付官兵俱在西南邊界東
路並無官兵堵截大掌櫃商量楚省年成尙好
糧食容易卽向大貴坪一路奔入洵陽今早趕
到王家坪原想攜些糧食卽由銅錢關竄入竹

山之界嶺就可活命我等俱拜高馬二掌櫃爲
師我與王必貴王四現當衝隊頭目張仁李二
虎俱係探馬其餘徐大武等都是戰手屢經打
仗統共有六七千人探聽新來官兵已往竹谿
平利實不料官兵從此路抄來今日被殺戰手
及受傷者甚多他們此時逃往何處實不知道
等語該匪等俱係正賊當卽正法其餘男婦大

並接慶津來信已由安康之四溝壩向西北一

帶兜剿臣現由東北迎截更可夾擊萬不敢予

賊以暇致有遲悞此次打仗兵勇間有損傷查

查明另行咨部奏入

上命軍機大臣傳諭長齡曰高二馬五二逆狡詐異

常奔越數省屢次戕害提鎮大員較之首逆徐添

德輾轉逃竄尤為可恨今長齡探得該匪屯聚洵

陽之王家坪一帶分派滿漢官兵同時並進直撲

賊匪大隊奮勇衝殺殲擒賊匪七百餘名吉林黑

龍江官兵初次遇賊接仗卽獲大勝所辦可嘉之

至長齡著交部議敘並頒發一兩重銀牌五百面

五錢重銀牌五百面著分賞打仗出力官兵以示

獎勵前因長齡素未經歷戎行領帶勁兵恐難得

力曾降旨令額勒登保派員迎赴前途將長齡所

帶官兵卽行歸入額勒登保隊內長齡作爲領隊
大臣聽候調撥今長齡截剿賊匪打仗得勝軍聲
已振此時賊鋒大挫正當乘勢搜捕長齡又未便
遽離該處現已降旨諭知額勒登保毋須令長齡
帶領勁兵前赴大營所有高二馬五一股賊匪卽
責成長齡帶領勝兵協同慶溥溫承惠併力剿辦
務將此股逆匪在洵陽地方速行剿淨如能將該

二逆生擒著卽在該處凌遲變割致祭前此被害

之施縉札勒杭阿王文雄等以慰忠魂而伸衆憤

或臨陣殲斃亦須驗明確實均著由六百里加緊

馳奏朕必將伊三人立加重恩如不能卽時剿滅

亦應逼向西面以便額勒登保迎頭截擊或向西

南逼入川境斷不可令其折竄楚省二竹一帶亦

不可令其越過漢江西北逸入南維等處致搜捕

又稽時日總須將此股迅速剷除淨盡若賊已垂
敗不可又棄而之他如那彥成前此不將高馬餘
孽剷竣貽累至今也

上又命軍機大臣傳諭額勒登保曰前因吉林黑龍
江兵丁皆係生力勁旅正當及鋒而用長齡素未
經歷行陣降旨諭令額勒登保派員迎赴前途將
長齡所帶官兵歸入額勒登保隊內長齡作爲領

隊大臣聽候調派本日據長齡奏到途次接平利

縣稟報並詢知高二馬五一股賊匪由大貴坪一

帶東奔長齡隨改道前往截擊共殲擒賊匪七百

餘名高二馬五二逆於賊黨中最爲兇悍屢經戕

害官兵損失提鎮大員今長齡能痛加剿殺軍威

大振已降旨命長齡會同慶溥溫承惠實力剿辦

額勒登保接奉此旨竟可不必派員迎調所有此

項吉林黑龍江兵丁仍著長齡帶領以資剿捕再
額勒登保現在剿辦之賊爲數無多卽日辦竣後
亦應帶兵前往督同長齡慶溥溫承惠等相機截
擊並著將現在剿辦情形及長麟所辦曾芝秀一
股目下曾否剿除淨盡一併據實具奏